

Cuestionamente di hurado durante eleccion di reina grandi

ORANJESTAD(AAN) Diahuebs anochi despues cu eleccion di reina grandi a tuma lugar den stadion di RCA, tabata tin hopi critica y cuestionamento riba esnan cu tabata hurado.

Criticanan no tabata dirigi riba esun cu a sali Reina di carnaval di Aruba, pero si riba formacion di hurado.

Den stadion di RCA ya caba cos a cuminsa broei y tabata tin hopi hende cu no tabata mucho contento cu e grupo di hurado.

DIARIO ayera durante dia tambe a haya hopi yamada relaciona cu formacion di hurado pa cu eleccion di Reina grandi di carnaval.

For di un hotel varios persona a remarca cu e hurado cu lo a bin di "Oklahoma" y cu nan a mira riba stage, ta nan manager pa un aña caba.

E persona aki ta un Frances naci na Colombia cu a bin Aruba for di Costa Rica!!

Tabata tin un otro dama Colombiano den e grupo di hurado cu tambe continuamente ta riba nos isla y desde december e ta na Aruba, segun a ser comenta.

Den e casonan aki no ta trata di hendenan cu ta menos cu 24 ora riba nos isla, manera cu normalmente mester ta e caso ora cu ta scoge turista pa sinta den grupo di hurado!

Hopi di esnan cu tabata yama ayera tabata haci suplica pa pidi SAC publica number di esnan cu tabata sinta den e grupo di hurado, pa asina por saca afor si enberdad e hendenan cu a ser cuestiona ta hendenan cu ta mas cu 24 ora na Aruba y sigur pa haya sa si enberdad tabata tin hende cu ta aki pa lunanan largo caba.

SAC mester demostra cu e supuesto Mericano no ta trahando na Aruba como manager na Alegro Americana y cu e dama cu a ser cuestiona, ta haciendo su prome bishita na Aruba y cu e no ta mas cu dos luna caba na Aruba o cu e ta bay bin cada biah.

For di cuminsamento cu nan a bin cu eleccion di Reina grandi pa carnaval, SAC a aplica e sistema pa haci uzo di turistanan cu ta menos cu 24 ora na Aruba pa nan sinta den e grupo di hurado.

Con ta para si bin sali afor si enberdad e personanan cu a haya critica, ta hendenan cu tabata mas cu 24 ora na Aruba?

Esaki ta encera cu e resultado por ser declara nulo?

Pa esnan cu a sali den e prome tresnan e situacion aki ta uno hopi fastioso y riba dje e forma di proceder aki lo ta un falta di respet grandi pa esnan cu a traha duro pa por a bay como candidata pa Reina grandi di carnaval.

No ta husto pa esnan cu a traha duro y a sali den e prome tresnan, pa nan bin tende cu tabata tin personanan den e grupo di hurado cu por ser cuestiona.

E reina grandi di Dream Team di Santa Cruz na ningun momento por bay perde su corona si bin resulta cu SAC no a haci su trabao manera debe ser.

Dreamteam a gana cu tur orguyo y tur candidata cu a participa a haci nan best y a duna pueblo un bunita presentacion y si SAC a pega barco anto esaki ta cay riba lomba di SAC y no por bay perhudica ningun candidata.

"Gana, ta Gana" y ta pesey e Reina di Dream Team cu tur orguyo y merecidamente por carga cu tur dignidad su corona durante carnaval 1998 y

no tin un hende cu por kita esaki di dje.

DIARIO ta felicita Dream Team y ta felicita Sharity

Kock cu su corona di Reina di carnaval 1998.

Hulanda a nombra PG van Daalen di nobo como PG di Aruba

ORANJESTAD(AAN) For di despacho di KABNA, DIARIO a haya ayera un comunicado den cual KABNA ta laga sa, cu Hulanda a nombra PG Van Daalen di nobo como Procurador General interino pa Aruba.

Van Daalen a fungi como PG interino di pais Aruba for di maart 1997 y mirando cu riba 6 di maart 1998 su periodo como PG lo termina, Consejo di Ministro di Reinio a dicidi cu e periodo di PG Van Daalen como PG interino di Aruba lo ser prolonga cu 6 luna mas.

E prolongacion lo tuma lugar enante 6 di maart 1998. Atrobe Hulanda ta papia di un prolongacion di 6 luna maximo o te na e momento cu durante e periodo nobo aki haya un PG permanente pa Aruba.

Pais Aruba no por bay keda aña aden aña afor cu un situacion cu ta un PG interino ta atende caso di pais Aruba y na e mesun momento e PG aki ta PG di Antiyas tambe.

Pa señor Van Daalen e situacion aki tambe lo mester ta uno hopi incomodo pasobra ta cada 6 luna e ta bolbe haya

sa con e ta para cu su trabao.

Hulanda mester stop di hunga e wega di ping pong cu PG Van Daalen y stop di laga e funcionario aki traha den un incertidumbre grandi pasobra esaki ta un falta di respet pa cu posicion y funcionamiento di señor Van Daalen.

O.P.C. lo a maltrata guardia

ORANJESTAD (AAN): Un caso di maltrato a worde reporta na Polis. E caso aki a tuma lugar den vecindario di un hotel. Telefonicamente Polis a worde notifica di e caso di maltrato aki.

Mientras tanto Patruya a presenta na e lugar indica pa atende e asistencia. Segun e guardia di inicial M.H.G. di 33 aña di edad, el a worde maltrata pa un O.P.C.

E maltrato ta encera cu e O.P.C. lo a tira santo den wowo di e guardia. E acto aki a pone su wowo eclipse, y cu na dado momento ta scuridat so e tabata nota.

Despues di a tuma nota di e caso aki, Polis a conseha e guardia pa acudi na Recherche. E guardia a duna di conoce e lo consulta cu su patron inicial R.Z.

